

1241  
L'ENTRETEN  
FAMILIER DV ROY,  
AVEC MONSIEVR  
LE DVC D'ANIOV  
SON FRERE,

à saint Germain en Laye:

*Fidelement recueilly par vn des Officiers de sa Majesté.*



A P A R I S,  
Chez HENRY SARA, au Mont S. Hilaire,  
pres le Puits Certain.  
M. DC. XLIX.



LENTRETIEN

FAMILIER DU ROY.


AVEC MONSIEUR

LE DUC D'ANJOU

SON FRERE.

A Paris chez Monsieur

de la Roche-Aymon, au Palais National.



A PARIS.

Chez HENRY SARA, au Mont St. Eustache,

près le Palais National.

M. DC. XLIX.



*L'ENTRETIEN FAMILIER DV ROY,  
avec Monsieur le Duc d'Anjou son Frere,  
à saint Germain en Laye.*

Fidelement recueilly par vn des Officiers de sa Majesté.

**B** IEN que les Rois soient continuellement obsedez d'une troupe importune de Courtisans, qui sous ombre de faire leur Cour, destruisent entierement leur liberté; & que le plus souvent ceux qui vsurpent leur autorité, leur donnent, sous ce pretexte de Grandeur, des Gardes qui épient toutes leurs actions: Il arriue toutefois assez souvent que ces Surveillans sont trompez, & qu'un moment de negligence rend toutes leurs precautions inutiles. Tout le monde sçait que la connoissance que le Cardinal Mazarin a de l'esprit du Roy, & la crainte qu'il ne soit aduerty par ses plus fideles Sujets de ses trahisons & de ses tyrannies, l'oblige à le faire observer continuellement par quelqu'un des siens, lors qu'il est contraint de l'abandonner un moment: Il n'a pû toutefois empescher, par ses défiances, que le Roy n'ait sçeu la verité de ses deportemens; ses connoissances trouvant un esprit plus solide que l'âge ne semble permettre, y ont fait tant d'impression, qu'il se retire souvent à l'écart pour entretenir ses pensées, & faire reflexion sur l'estat des affaires presentes.

Vn iour que l'assemblée du Conseil secret l'auoit laissé presque seul, il s'appuya sur la fenestre d'une Gallerie qui regarde sur le Parc, & demoura tellement immobile dans cette posture, que quelques jeunes Seigneurs qui le suiuiotent, se retirerent craignans d'interrompre sa resuerie. Dans ce mesme moment Monsieur le Duc d'Anjou, qui, suivant son naturel, ne peut demeurer long-temps en un lieu, & qui se dérobe à tous ses gens pour auoir plus de liberté, vint à passer par cette Gallerie, & trouuant le Roy en cet estat, demeura quelque temps à le considerer; enfin s'approchant doucement de luy, il le saisit par derriere en luy disant, le vous y prens, mon petit Papa, auoüez-moy que vostre esprit estoit bien loin d'icy. A ce bruit le Roy se retournant tout à coup, comme s'il fut sorty d'un profond sommeil, luy répond; Il est vray, mon frere, que vous m'avez surpris, & que vous m'avez en un moment transporté de Paris à saint Germain. Je voy bien, reprit le Duc d'Anjou, que vous souhaitez bien d'y estre presentement, & qu'il vous fache au-



tant qu'à moy de passer dans ce Chasteau vne si rude saison, que le Bal & la Comedie rendoit autant agreable à Paris, qu'elle est ennuyeuse dans ce lieu. Je vous auoüe, repart le Roy, que l'éloignement de Paris m'est fort sensible; mais ces foibles diuertissemens ne me le rendent pas insupportable, c'est vn sujet plus serieux qui m'en fait desirer le retour; si vous me voulez promettre d'estre secret, ie vous en declareray naïuement la cause. Hé quoy, mon petit Papa, reprit le Duc d'Anjou, croyez-vous que ie voulusse perdre vos bonnes graces pour si peu de chose? non, non, soyez assuré que ie mourrois plustost que de decouvrir ce que vous me direz. Puis que vous me le promettez, continue le Roy, ie ne vous celeray rien de ce que ie pense. Bien que nous soyons encore jeunes, vous auez pû remarquer, aussi-bien que moy, le pouuoir que Monsieur le Cardinal a sur ma bonne Maman, & en suite celuy qu'il a vsuré sur moy: le l'ay reconnu du commencement dans mes diuertissemens & mes promenades, qui ne se faisoient iamais sans son congé: mais depuis que j'ay esté capable de penetrer plus auant, j'ay remarqué qu'il gouverne non seulement ma Personne, mais aussi tout mon Estat; que rien ne se fait sans ses ordres, & que la Reyne n'a que le nom de Regente & luy en laisse tout le pouuoir: ce qui me semble d'autant plus estrange, que j'ay appris qu'il est Estranger, & sujet naturel du Roy d'Espagne: car quelle assurance peut-on auoir de la fidelité d'un homme qui se porte contre son Prince naturel? ou pour mieux parler, pourquoy ne craindra-t'on pas qu'il trahisse plustost vn Estat estrange que son Roy legitime? Certainement cela m'estonne: car si ma bonne Maman n'estoit pas capable de gouverner ce Royaume, pendant ma jeunesse, elle pouuoit prendre le conseil de mon Oncle le Duc d'Orleans, de mon Cousin le Prince de Condé, ou de plusieurs autres Princes & Seigneurs de ma Cour, que la nature & le deuoir attachoient plus fortement à sa conseruation, sans souffrir la honte d'en aller chercher chez les Estrangers: mais ie voy qu'ils dépendent tous de luy aussi-bien que moy; & que luy seul ne dépend de personne: Encore, s'il s'acquitoit bien de son Ministère, & s'il n'auoit pour but que le bien de l'Estat, il se rendroit digne en quelque façon de cette charge: mais on n'entend par toute la France que les cris des Peuples qui se plaignent de la misere du temps & du gouvernement; que tout est reduit à l'aumosne; & que par vne mal-heureuse égalité les plus riches sont dans le mesme estat que les plus pauvres. Bien que ie ne puisse pas encore raisonner sur la cause de ce desordre, ie connois bien toutefois qu'il ne peut prouenir que de luy; mais ce qui s'est passé depuis six mois, m'en a tout à fait assuré, lors qu'apres auoir esté témoin de la joye publique au dernier *Te Deum*

qui



qui fut chanté pour la victoire de Lens, j'appris le lendemain que tout Paris estoit en armes, que chaque chaisne estoit vne forte barricade, & que chaque barricade estoit vne Ville fortifiée. Quand ie voulus m'informer de la cause de cette rumeur, l'on me fit à croire que les Parisiens auoient pris les armes pour se rendre les Maistres du Palais Royal, y mettre le feu, & faire passer tout ce qui estoit dedans au fil de l'épée. La difficulté que i'eus à croire cecy, m'obligea de m'en éclaircir plus particulièrement; alors vn de mes plus fideles seruiteurs m'apprit que le dessein des Parisiens n'estoit que d'obtenir la liberté de deux Magistrats que le Cardinal Mazarin auoit fait enleuer au sortir de cette ceremonie; & que cette action violente leur auoit fait prendre les armes pour l'obliger à leur rendre leurs Protecteurs. Cependant vous sçauiez quel desordre ce bruit causa dans le Palais Royal; & que si les Bourgeois eussent voulu vser de leur auantage, il leur eût esté bien facile de s'en rendre Maistres, & de se venger du Cardinal Mazarin, qui sentoit d'estranges convulsions durant ce temps; neantmoins le respect qu'ils me portoient, retint leur iuste fureur, & les fit contenter de la liberté de ces Senateurs, que le Cardinal fut contraint de leur rendre aussi laschement qu'il les auoit arrestez. Leur presence calma dans vn moment cette sedition, & les remerciemens que la Reyne fit en ma presence aux premiers de la Ville de la fidelité qu'ils auoient témoignée en cette occasion, me faisoit croire que tout estoit appaisé: mais j'ay bien reconnu depuis que son ressentiment & celui du Cardinal n'estoit que dissimulé, à la sortie que l'on me fit faire sans suite de cette Ville, & au sejour que nous fismes en ce lieu dans les incommoditez de l'hyuer. Il falut retourner toutefois à Paris, & retarder leur vengeance jusques à ce que l'occasion s'en presentast. Pour mieux couvrir leur dessein, ils font courir le bruit que toutes les affaires sont accommodées, lors qu'une nuit que toute la Ville est en festin, ie me sens réveiller en sursaut, enleuer du lit, & me jeter encore tout estourdy dans vn carosse, qui m'emporta dans les tenebres au trauers des champs, avec beaucoup de froid & d'incommoditez, sans sçauoir où j'allois, qu'alors que le iour suruenant me fit voir cette maison. L'auoüe que cette seconde fuite m'estonna grandement, pource que ie n'en pouois imaginer de sujet: toutefois me voyant accompagné du Duc d'Orleans & du Prince de Condé, leur presence me rassura en quelque façon, mais leurs discours ne firent pas grande impression sur moy; Ils m'assuroient que l'on m'auoit saué des mains du Parlement, qui auoit complotté avec l'Ennemy de se saisir de ma personne, & de me mettre entre ses mains. Je feignis de croire cecy, mais depuis ce temps j'ay sceu de bonne part que c'est vne fausse & gros-



siere calomnie; que le dessein du Cardinal Mazarin n'a esté que de sortir de Paris pour se venger de ses habitans, en bloquer les auenües, & destruire par la famine cette grande Ville; qu'au reste le Parlement n'a que de bonnes intentions pour mon seruice; que tout le Peuple me desire, & que l'on n'en veut qu'à Mazarin, comme à celuy qui leur ayant vollé tous leurs biens, & enleué leur Roy, veut encore raur leur vie, & se venger d'eux aux dépens de tout le Royaume. Je ne m'estonne pas beaucoup que le Cardinal ait conceu ces desseins violens, & qu'il médite la perte d'un Estat qu'il luy faut abandonner; mais ie ne puis assez admirer qu'il soit suiuy, & mesme poussé, s'il le faut dire ainsi, à cette vengeance par des Princes qui ont plus de sujet de le perdre que de le conseruer, ayant jusques icy occupé leur place dans le gouuernement de l'Estat, & leur ayant donné des ordres qu'il deuoit receuoir d'eux-mesmes; & pour dire en un mot, qui les a voulu perdre tant de fois, & qui les veut encore faire perir dans cette occasion, en les exposant à la haine du Peuple qui souffre leurs hostilitéz.

Pour Monsieur le Duc d'Orleans mon Oncle, (interrompit le Duc d'Anjou) j'ay bien reconnu à quelques discours de ma tante la Duchesse & de Madamoiselle ma cousine, qu'il est sorty malgré luy de Paris, & qu'il voudroit y estre presentement.

Ie ne puis pas conceuoir (continüe le Roy) qui peut l'auoir forcé dans vne action qu'il jugeoit injuste & déraisonnable, puis qu'il auoit le pouuoir de l'empescher, & qu'il y estoit obligé: Pour moy j'auoüe que tout ce procedé me choque extremement, & que ie ne puis souffrir la violence que l'on veut exercer contre la ville de Paris, qui est la capitale de mon Royaume, & celle qui a tousiours témoigné plus de zele & d'affection pour son Roy. C'est bien mal reconnoistre l'allegresse qu'elle témoigna, comme j'ay sçeu, à ma naissance; & c'est bien tromper l'esperance qu'elle auoit conceüe de moy, que de la vouloir perdre entièrement, pour s'estre opposée à la ruine entière de l'Estat, & pour l'auoir voulu deliurer de son Tyran, ie nomme ainsi le Cardinal Mazarin, car ie sçay qu'il en a fait toutes les actions, qu'il a quelque intelligence avec les Ennemis de l'Estat, qu'il a procuré beaucoup d'auantages à l'Espagne, & qu'il en a fait perdre de notables à la France; & qu'enfin pour se rendre considerable en Italie, où il a dessein de retourner, il y a fait porter presque tout l'argent du Royaume qu'il a tiré du Peuple par des exactions injustes & violentes. Ces crimes estans veritables, & connus de tous les Princes, pourquoy refusent-ils de le remettre entre les mains du Parlement pour luy faire son procéz? N'y a-t'il pas apparence de croire qu'ils participent à ses injustes desseins, puis qu'ils en veulent empescher



la punition? Certainement si ie puis vn iour estre absolu, ie leur feray bien rendre compte de la negligence qu'ils ont témoignée au salut de l'Estat, & au soulagement du Peuple.

Il est vray, répond le Duc d'Anjou, que le Peuple est en vn pitoyable estat; n'agueres ie ne me pus tenir de pleurer au recit qu'un pauvre païsan faisoit au Duc d'Orleans, des maux qu'ils ont soufferts depuis longtemps, & des violences & cruautéz qui ont esté depuis peu de iours exercées contr'eux par les troupes Mazarines.

Ie ne puis pas concevoir, reprit le Roy, quel est le but & la fin de cette guerre, & quel pretexte ils prennent pour ruiner le cœur de la France.

Ie leur ay entendu dire, replique le Duc d'Anjou, que c'est pour punir vos Sujets de leur desobeïssance, & pour maintenir l'autorité Royale.

La puissance des Rois (continue le Roy) ne s'estend pas jusques aux choses injustes, & lors qu'ils l'employent à la ruine de leurs Sujets, ils se rendent indignes de ce nom: Qu'ils disent donc plus veritablement que c'est pour faire subsister la tyrannie qu'usurpe injustement cette autorité, & qui la destruit plustost que de la conseruer? Est-ce maintenir l'autorité d'un Roy que de saccager son Royaume? ne sçait-on pas que la puissance des Souuerains consiste dans la richesse de leurs Sujets, & que la ruine des vns cause la foiblesse des autres? qu'ils cessent donc de publier qu'ils combattent pour leur Roy, & qu'ils confessent plustost qu'ils joignent leurs armes avec les Ennemis pour la destruction de son Estat, puis qu'ils exercent contre luy de plus grandes hostilitéz que les Estrangers n'en ont iamais commis; & qu'abandonnant la Frontiere du Royaume au commencement de la campagne, ils les conuient de s'emparer des membres cependant qu'ils en attaquent le chef pour le partager entr'eux apres s'en estre rendus maistres. Mais ils ne viendront pas à bout de leurs pretentions, car i'ay sçeu que les Parisiens ont vne puissante armée sur pied, qu'ils ont pour Chef mon Cousin le Prince de Conty, les Ducs d'Elbeuf, de Longueville, de Beaufort & de Bouillon & plusieurs autres Seigneurs des plus sages & des plus vaillans de la Cour; que presque tout le Royaume leur donne les mains, & que tous ensemble ont resolu de metir de celles du Cardinal & de me ramener à Paris pour remedier aux desordres de l'Estat. Ie voudrois auoir le pouuoir & la liberté de les aller trouuer, car ie suis tellement assuré de leur seruice, que ie ne feindrois point de me remettre entre leurs mains; mais ie suis icy gardé de si pres, que ie ne puis sortir du Chasteau sans auoir à mes costez les confidens du Cardinal. Ie ne suis pas seul dans cette contrainte, & ie remarque que le Duc d'Orleans mon Oncle, & tous ceux qui sont affectionnez à mon seruice, sont obseruez d'aussi pres que moy, pour em-



pescher les bons desseins qu'ils pourroient auoir pour ma liberté. l'esper-  
 re que nous serons bien-tost deliurez de cette seruitude, & que ma bonne  
 Maman sera contrainte enfin de retourner à Paris, & de renoncer au de-  
 sir de vengeance: car ie ne voy pas qu'elle puisse executer le dessein qu'elle  
 auoit de les forcer à luy venir demander pardon, puis qu'elle s'assu-  
 roit, comme i'ay sceu, que huit iours apres nostre sortie, le pain venant  
 à faillir, le Peuple se souleueroit contre le Parlement, & l'obligeroit  
 de venir avec luy la corde au col implorer sa misericorde: Et cependant  
 vn mois & pluss'est passé depuis nostre départ, sans que les viures y aient  
 manqué, & sans que le Peuple ait tant soit peu murmuré contre le Par-  
 lement: Au contraire, le mal qu'ils souffrent dans cette guerre, ne sert  
 qu'à les animer de plus en plus à la perte du Cardinal Mazarin; & il est  
 certain que plus elle retardera, & plus leurs forces augmenteront, & les  
 siennes diminueront: car i'ay sceu, par l'arriuée de plusieurs Seigneurs,  
 & particulièrement du Marechal de Schomberg, que les meilleures  
 Villes de la France se declarent de iour en iour pour le Parlement, &  
 qu'elles refusent les ordres du Cardinal. Ce n'est donc plus de Paris seu-  
 lement qu'il faut se venger, c'est de toute la France qui suit cette  
 Ville capitale, comme le reste du corps suit le chef: si bien que c'est  
 mettre tout l'Estat en combustion, que de s'obstiner plus long temps à  
 vne si temeraire entreprise, qui n'a pour motif que la passion d'un Estran-  
 ger, qui voudroit, par sa tyrannie, retirer mes Sujets de l'obeissance  
 qu'ils doiuent à leur Roy: mais ils me sont si fideles, qu'ils sçauront bien  
 démesler mes interets de ceux de ces mauuais Ministres, qui ont abusé  
 de mon Nom & de ma Minorité pour accroistre leur ambitieuse fortu-  
 ne. Que si ie puis vn iour auoir la puissance Royale, dont ie n'ay main-  
 tenant que le Nom, ie sçauray punir aussi rigoureusement ces pestes  
 d'Estat, que recompenser largement ceux qui se sont opposez à leurs  
 injustes desseins.

Sur ce mot, le Roy se retira de la fenestre où il s'estoit arresté au bruit  
 de quelques Seigneurs qui le vindrent saluer, & n'eut que le loisir de re-  
 commander à son Frere la discretion qu'il luy auoit promise; mais cet  
 entretien ne pût estre si secret qu'il ne fût entendu par vn Officier du  
 Roy, qui l'écoutoit sur vne fenestre prochaine, & qui a creu le deuoir  
 publier pour asseurer les fideles François, que le desir de leur Roy se-  
 conde leurs intentions, & les obliger d'employer leurs biens & leurs  
 vies pour sa liberté, & pour la destruction de ses Ennemis.